

Delegacija Parlamentarne skupštine Bosne i Hercegovine, podržala je u Briselu, tokom sastanka Odbora za industriju, istraživanje i energiju Evropskog parlamenta, realizaciju ciljeva Energetske zajednice u pravcu širenja jedinstvenog evropskog energetskeg tržišta na zemlje Jugoistočne Evrope i druge zainteresovane zemlje, javlja Anadolu Agency (AA). Delegaciju PSBiH koja je učestvovala na sastanku Odbora za industriju, istraživanje i energiju Evropskog parlamenta činili su zamjenik predsjedavajućeg Komisije za saobraćaj i komunikacije Predstavničkog doma Nikola Lovrinović i zamjenik predsjedavajućeg Komisije za spoljnu i trgovinsku politiku, carine, saobraćaj i komunikacije Doma naroda PSBiH Sead Kadić

U ime naše delegacije, učesnike sastanka u Briselu pozdravio je gospodin Nikola Lovrinović koji je naglasio da Bosna i Hercegovina pruža podršku nastojanju da se u zemljama susjedima Evropske unije (EU) uspostavi isti pravni okvir u oblasti energetike kakav vlada u EU, što bi, kako je naveo, Bosni i Hercegovini obezbijedilo poziciju koja bi omogućila privlačenje većih stranih investicija i daleko veće iskorištavanje ogromnih potencijala koje BiH ima u oblasti energetike.

Članovi delegacije PSBiH podsjetili su i na činjenicu da od 1. juna ove godine na snagu stupa Sporazum o stabilizaciji i pridruživanju, kojim se uspostavlja područje slobodne trgovine EU sa BiH i podstiče regionalna saradnje, što je, kako su istakli, kompatibilno ciljevima Energetske zajednice.

Delegacija BiH podržala je i prijedlog prema kojem bi se uskoro osnovala Parlamentarna skupština Energetske zajednice, što bi, kako je rečeno na sastanku, dalo novu dimenziju radu te organizacije i omogućilo lakše usvajanje zakona iz oblasti energetike u parlamentima zemalja Energetske zajednice.

Sastanku u Briselu, osim BiH, učestvovala su i druge zemlje Zapadnog Balkana koje su potpisale sporazum sa Energetskom zajednicom, uključujući i Moldaviju i Ukrajinu.